

Pisortat suliffeqarfiutaanni tamani inuttassarsiuussinerit suliamut tunngasumik piginnaasaqarnissaat piumasaqaataassaaq, kalaallit oqaasinik piginnaasaqarneq ilanngullugu kiisalu kalaallit kulturiannut kalaallillu inuiaqatigiivinut ilisimasaqarnissaat pillugit Naalakkersuisut Inatsisartunut inatsisissamik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Inatsimmut siunnersuut UKA2026-mi kingusinnerpaamik saqqummiunneqassaaq.

Naleqqap gruppianit saqqummiunneqartoq

pillugu

Inatsisinut Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Aqqalu C. Jerimiassen, Atassut, siulittaasoq

Inatsisartunut ilaasortaq Kuno Fencker, Naleraq, siulittaasup tullia

Inatsisartunut ilaasortaq Pipaluk Olsen, Demokraatit

Inatsisartunut ilaasortaq Iddimanngiiu Jensen Bianco, Inuit Ataqtigiit

Inatsisartunut ilaasortaq Lars Poulsen, Siumut

UKA2025-mi ulloq 17. oktober 2025-mi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Ilaatigut kalaallit oqaasiinik pisinnaasaqarnissap, kalaallit kulturiannik ilisimasaqarnissap il.il. pisortat atorfinnik inuttassarsiuneranni inatsisitigut piumasaqaatitut aalajangersaavigineqarnissaa siunnersuutikkut siunertarineqarpoq. Siunnersuut akuerineqassappat Naalakkersuisut kingusinnerpaamik UKA2026-mi inatsisissatut siunnersuummik saqqummiusseqqullugit peqquneqassapput.

Siunnersuutip Inatsisartunit siullermeerneqarnera

Siunnersuut siullermeerneqarami assigiinngitsunik isumaqarfigineqarpoq. Siunnersuut UKA2025/147-mut pisortani nutserisarnissamik piumasaqaammut tunngasumut ataqatigiisillugu suliarineqarpoq.

Kalaallisut oqaatsit siuarsarneqarnissaat atorneqarnissaallu pingaaruteqartoq isumaqataaffigilluarneqarpoq, aamma pisortatigoortumik sulinernullu atatillugu. Taamaattorli najugaqavissut kalaallit oqaasiinik piginnaasallit pisortani oqartussaasuni amerlanerulernissaannik anguniagaqarneq qanoq anguneqarsinnaanersoq oqallisigingaatsiarneqarpoq.

Siumut siunnersuummut matumunnga allannguutissatut siunnersuummik imaattumik saqqummiussivoq:

“Qitiusumik allattoqarfimmi sulisunik aamma suliffeqarfinni namminersortuutitani il. il. pisortaanernik atorfinitsitsisarneq pillugu kaajallaasitaq nutarterneqassasoq. Taamaasiornermilu allaffissornikkut aningaasartuutit appartinneqarnissaat anguniarneqassasoq silassorissuusiap atorluarneqarneratigut, kiisalu atorfinitsitsisarnermut ataatsimiisitaliami kalaallisut oqaatitsinnik kulturitsinnillu ilisimasalinnik piginnaasaqartunillu inuttalersorneqartalernissaa piumasaqaataatilersillugu kaajallaasitaq nutarterneqassasoq. Tamakku tunngavigalugit Naalakkersuisut inatsisissanik kaajallaasitanik maleruagassanillu pisariaqartunik kingusinnerpaamik UKA2027-mi Inatsisartunut saqqummiussissuteqassasut.”

Ilaatigut tamanna tunngavigalugu siunnersuut ataatsimiititaliamit suliarineqartussanngorlugu innersuunneqarpoq.

Siunnersuutip aningaasaqarnikkut kingunerisassai

Aalajangiiffigisassatut siunnersuutit piviusunngortinneqarneranni aningaasaqarnikkut allaffisornikkullu kingunerisassat siunnersuutip tunngavilersuutitaani nassuiaatigineqartassasut Inatsisartut suleriaasianni § 33, imm. 1-imi allassimavoq.

Siunnersuutip piviusunngortinneqarnerani aningaasaqarnikkut kingunerisassat siunnersuummi nalunaarneqartut ataatsimiititaliamit maluginiarneqarpoq, taamaalilluni AC-fuldmægtigip 250.000 kr.-inik naleqartumik ukiup affaani sulisorineratigut piviusunngortinneqarsinnaasut nalilerneqarluni.

Ataatsimiititaliap siunnersuummut oqaaseqaatai

Ataatsimiititaliamit oqaatigineqassaaq pisortani atorfinitsitsisarnerit namminersortut atorfinitsitsisarnerannit allaanerussuteqarmata, tassa pisortani atorfinitsitsisarnerit – atorfinitsitsisarnermi inatsisitigut malittarisassat saniatigut - ingerlatsinermik inatsisitigut aammalu ingerlatsinermik inatsiseqartitsinermi tunngavinnit nalinginnaasunit aamma maleruagassiorneqarmata. Tassa atorfinitsitsineq sulisitsisup nammineq naliliinera aallaavigalugu pisarpoq, tamatumani inatsisit aammalu ingerlatsinermik inatsiseqartitsinermi tunngaviit, soorlu assigiimmik pinnittussaaneq, pissaanerup atornerlunneqannginnissaa il.il., malinneqassallutik.

Atorfinitsinneqartup ataatsimut naliliineq aallaavigalugu piukkunnarnerpaajunera pisortat atorfinitsitsisarneranni aalajangiisuusarpoq. Tamanna malillugu pisortani oqartussaasoq atorfimmuut piukkunnarnerpaamik toqqaanermi kinaassusersiornani naliliissaaq, taamaalilluni qinnuteqartut akornanni toqqaannartumik toqqaannangitsumilluunniit assigiinngisitsisoqaqqunagu.

Inatsisit atuuttut pillugit nalinginnaasumik ilisimasassat, inatsisiliornermi tunngavigineqartartut ilaat, ataatsimiititaliamit oqaatigineqassapput.

Taakkunani kaajallaasitat allaffissornikkut peqqussutaapput, sulinermi nalinginnaasumik peqqussutinut atorneqartartut. Tassa nalinginnaasumik peqqussutit pituttuisuusut pisortanut taamaallaat sammititat.

Akerlianik nalunaarutit atorneqartarput innuttaasut, suliffeqarfiit il.il. akornanni inatsisitigut inissisimaneq malittarisassatigut aalajangersarneqaraangat imaluunniit taakku pisortanut tunngatillugu pisussaaffilerneqaraangata. Kiisalu nalunaarutit atorneqartarput innuttaasut, suliffeqarfiit il.il. pisortanut tunngatillugu pisinnaaffii malittarisassiunneqarpat.

Inatsisit pisariaqanngitsunik imaqartariaqannginnera tunngaviummik najoqqutarisassaavoq. Tamatuma ilaatigut nassataraa makku pillugit malittarisassanik aalajangersaarususkaanni inatsisitut ilusiliineq aallaavittut aatsaat atorneqartariaqarmat,

- innuttaasut, suliffeqarfiit il.il. akornanni inatsisitigut inissisimaneq malittarisassatigut aalajangersarneqassagaangat
- innuttaasut, suliffeqarfiit il.il. pisortanut tunngatillugu pisussaaffilerneqassagaangata

- imaluunniit innuttaasut, suliffeqarfiit il.il. pisortanut tunngatillugu pisinnaaffilerneqassagaangata.

Assersuutigalugu qitiusumik allaffeqarfimmi atorfinitsitsisarnernut periutsinut il.il. pingaarnertut tunngavissat siunnersuuteqartup oqarneratut qitiusumik allattoqarfimmi sulisunik aamma suliffeqarfinni namminersortuutitani il. il. pisortaanernik atorfinitsitsisarneq pillugu kaajallaasitami allassimapput.

Atorfinitsitsinissamut nalilersuinernullu ataatsimiititaliamik katiterinermi kalaallit kulturiannut kalaallillu inuiaqatigiivinut tunngasunik aamma qitiusumik allaffeqarfiup suliffittut suuneranik ilisimasaqartuunissap sapinngisamik qulakkeerniarneqarnissaa pillugu piumasaqaat nalunaarummi aalajangersarneqareerpoq. Atorfinnik inuttassarsiuinermi kalaallisut oqaatsitigut piginnaasaqarnissaq kiisalu kalaallit kulturiannik inuiaqatigiinnilu pisutsinik ilisimasaqarnissaq piumasaqaatit ilagigaat aamma aalajangersarneqarpoq.

Tamanna tunngavigalugu siunnersuut, inatsisitigut inissisimanermut allanngortitsinani taamaallaalli inatsisikkut aalajangersarneqarnermigut allaffissornikkut artukkerneqarnermik nassataqassanersoq ataatsimiititaliamit oqaluuserineqarpoq. Kaajallaasitaq qitiusumik allaffeqarfimmut pituttuisooreermat ataatsimiititaliamit oqaatigineqassaaq. Kiisalu ataatsimiititaliamit oqaatigineqassaaq kaajallaasitamik unioqqutitsinerit uppersarnissaat ajornakusoortuummat, pisortaniami atorfinnut atorfinitsitsinerit naluneqanngitsutut ataatsimut naliliinermik tunngaveqartarmata.

Siumup allannguutissatut siunnersuutaanut immikkut tunngatillugu ataatsimiititaliamit oqaatigineqassaaq allannguutissatut siunnersuutikkut pissutsit kaajallaasitami maanna atuuttumi ilaatinneqareersut aalajangersarneqarnissaat ilaatigut anguniarneqarmat. Kiisalu ataatsimiititaliamit oqaatigineqassaaq kaajallaasitaq allaffissornikkut peqqussutitut aalajangersarneqartarmat taakku Inatsisartunut saqqummiunneqarneq ajortut.

Ataatsimiititaliap inassuteqaatai

- Ataatsimiititaliami amerlanerussuteqartut Demokraatineersut, Inuit Ataqatigiinneersut Atassummeersullu Siumup allannguutissatut siunnersuutaa siunnersuutaaqqaartorlu itigartinneqarnissaat inassutigaat.

Ataatsimiititaliap taama oqaaseqaateqarluni isumaliutissiisummilu allassimasutut paasinnil-
luni siunnersuut aappassaaniigassanngortippaa.

Aqqalu C. Jerimiassen
Siulittaasoq

Kuno Fencker
Siulittaasup tullia

Pipaluk Olsen

Iddimangiiu Bianco

Lars Poulsen